



17. januar 2016

Inatsisartut Suleriaasianni § 37 naapertorlugu Naalakkersuisunut apeqqutit imaattut matumuuna saqqummiuppakka:

**Naalakkersuisunut apeqqutit qanoq iliorsinnaanitsinnut Tasiilaq ikiorniarlugu.**

1. **Naalakkersuisut qanoq iliorpat aamma Naalakkersuisut qanoq iliorsinnaappat Tasiilami ilaquttat allallu kalluarneqartut sakkortuumik misigisaqarsimasut ikiorniarlugin? Pilersaaruteqartoqarpa imaluunniit eqqarsaatigineqarsimanerluni immikkoortumi qanoq suliniuteqartoqarsinnaasoq?**
2. **Naalakkersuisut iliuusissanut pilersaarutinik sunik peqarpat inuttut ajornartorsiutit imaannaanngitsut maannakkut Tasiilami artorsartitsisut qulaarniarlugin? (Iliusissanut pilersaarutit naliginnaasumik nuna tamakkerlugu, ajornartorsiutit pineqartut assiginik imallit)**
3. **Naalakkersuisut nalilernerlugu suliniutit pioreersut eqqarsaatigineqartullu naamattut ajornartorsiutit aaqqinneqarnissaannut imaluunniit pisariaqarpa ataqatigiissumik suliniuteqartoqarnissaa maannamut naleqqiullugu annertune-rungaartumik? Taamaassimappat, suliaq aallartinneqassamaarpa?**
4. **Namminersorlutik Oqartussat, kommunit allallu taama pisoqartillugu suleqatigineqartartut akornanni suleqatigiiuttoqarnerluni?**
5. **Naalakkersuisut isumarpat pisariaqartoq Tasiilami immikkut suliniuteqartoqas-sasooq?**
6. **Naalakkersuisut suliniut nukittorsarniarlugu periarfissat suut takusinnaavaat aamma Naalakkersuisut tigussaasumik qanoq iliussamaarpas?**

(Inatsisartunut ilaasortaq Randi Vestergaard Evaldsen, Demokraatit)

**Tunngavilersuut**



Ukiortaerneraniit ullaat 14-t ingerlasimatsiaannartut Tasiilami inuartoqarpoq aamma inuit marluk imminut toqupput. Pisut alianarluinnarput inuiaqatigiinnguanik annertuumik aalassatsitsisut.

Kommuneqarfik Sermersooq ingerlaannaq ajornartoornermi suleqatigiittussanik, tarnip pis-susaanut imminnut ilismasalinnik tarnillu nakorsaanik Tasiilaliartitsivoq, sumiiffimmi ajornartoornermi upalungaarsimasunut ikorfartuiartortussanik. Tassa kommunip tungaaniit iliuuseqartoqarpoq pisumi ikuukkiartortoqarluni.

Inatsisartut tungaanniit apeqquaasariaqarpoq, UANGUT qanoq iliorsinnaanersugut ikuuk-kumalluta. Maannakkut pisoq kisiat eqqarsaatiginagu aammali naliginnaasumik. Ajoraluartumik aatsaat taama pisoqanngilaq aamma kingulliunavianngilaq, naak taamaaqqunaruvaluaqisoq - Ar-laannik iliuuseqartariaqarpugut. Isumaqpungu akisussaaffeqartugut, inuiaqatigiittut, politikeri-tut, inuttullu. Isumaqpungu arlalitsigut suliniuteqartariaqartugut, immikkoortumi ataasiin-naanngitsumi, arlalinnili. Kommuni, namminersorlutik oqartussat innuttaasullu akisussaaffimmik uani tigusisariaqarput.

Meeqqat sumiginnarneqartarerat, kinguaassiutitigut atornerluisarneq, ikiaroornartumik hashi-mik atornerluineq, aningaaasanoorneq, erngunneq il.il. ajornartorsiutaapput. Inuppassuit tamakku ulluinnarsiutigilernikuuaat, ajoraluartumillu taamaattussaannartut isigineqalernikuupput.

Naamerluinnaq, akuerineqarsinnaanngilaq meeqqamik atornerluineq! Naagga, imigassaq pingaarterutinneqarsinnaanngilaq meeqqamut naleqqiullugu. MIO-p nalunaarusiaa takusiuk, takusiuk qanoq meeqqat oqalunnersut - ajornartorsiutit ullaat tamaasa takusarpaat. - Meqqat nuna tamakkerlugu nillapput, inuunerminni atukkatik tujorminartut nilliaatigaat, angajoqqaaminnik sumiginnarneqarlutik - oqarput hashii imigassarlu salliukkaat namminnerlu tunulliunneqarlutik - uangulli Inatsisartuni alla pinngilarput namminersulivinnissaq, saammaasseqatigiinnissamut isumaqalioqatigiisitat aamma ikinngutigut qanoq aalisartigissanersut. Kisianni qappunnitsinni aammalu utoqqatseraluarlunga "suunngitsunik eqqartuunitsinni" innuttaasut ima atungarlior-tigaat aamm aima ajornartorsiuteqartigaat, allaat imminut toquutarlutik. Tamana peqataaffi-gisinnaanngilarput.

Innultaasut amerlassusaat tunngavigalugu Tasiilami imminut toquttartut amerlanerpaapput<sup>1</sup>.

---

<sup>1</sup> Bjerregaard og Larsen, 2015, i International journal of Circumpolar Health



Tasiilami aamma allatigut inuttut ajornartorsiuteqarneq eqqarsaatigalugu imaannaanngitsorsiortorpassuupput.

Tasiilami meeqqat 1000-t missaaniittut akornanni affaasa missaat inuttut ajornartorsiuteqarput<sup>2</sup>.

Tasiilami angerlarsimaffimmi eqqissiviilliiornerit nalunaarutigineqartartut nuna tamakkerlugu amerlanerpaat tulleraat, taamaallaat Nuummi amerlanerupput, naak Nuummi innuttaasut arfineq-pingasoriaammik amerlanerugaluartut<sup>3</sup>. 2015-mi Tasiilami pinngitsaaliinerit 13-t nalunaarutigineqarput. Taamaallaat Qaqortumi Nuummilu nalunaarutigineqartut amerlanerupput. Aamma suliffissaaleqineq Tasiilami inuttussunermut naleqqiullugu annertoorujussuuvoq: Nuna tamakkerlugu qiviaraanni Tasiilami suliffissaaleqisut amerlanerpaat pingajoraat - nuna tamakkerlugu agguaqatigiisitsinermut naleqqiullugu marloriaataallutik<sup>4</sup>.

Tamanna inuttut annertuumik ajornartorsiuteqartoqarneranut assersuutiminiiinnaavoq, Tasiilap nanertuitigisaanut.

Ajornartorsiutit taakku iluarsinissaannut pisariaqarpoq annertuumik, angusassamik toraagaqarlu-ni, arlalinnik iliuuseqarnissaq kommunip aamma namminersorlutik oqartussat tungaanniit. Suliniut qularnanngitsumik ukiut arlallit tulliuttut ingerlanerini nukippasuarnik pisariaqartitsissaq.

Isiginngitsuusaaginnarsinnaanngilarput nunatta ilaa ajornartorsiutinik ipilersoq. Tasiilap pisariaqtippaa ikuunnissarput.

Taava apeqquataalerpoq: Qanoq iliorsinnaavugut ikuukkumalluta?

Apeqquit akeqqakka ullut suliffiit naliginnaasut qulit iluanni.

---

<sup>2</sup> Nakkutilliiermut nalunaarut, april 2016.

<sup>3</sup> Politit ukiumoortumik nalunaarutaat 2014

<sup>4</sup> Tasiilaq Kalaallit Nunanani Naatsorsueqqissaartarfik naapertorlugu 2014-mi Tasiilami suliffissaaleqisut 19,2 - usimapput. Nunap sinnerani agguaqatigiisillugu suliffissaaleqisut 10,3-iupput.